

四庫全書

集部

欽定四庫全書

集部

文山集卷

十九

詳校官庶吉士李傳熊

主事臣呂雲棟覆勘

總校官進士臣朱鈐

校對官主事臣陳文樞

膳錄監生臣蘇爾博

欽定四庫全書

文山集卷十九

宋 文天祥 撰

指南後錄一

過零丁洋

辛苦遭逢起一經，干戈落落四周星。
山河破碎風拋絮，身世飄搖雨打萍。
惶恐灘頭說惶恐，零丁洋裏歎零丁。
人生自古誰無死，留取丹心照汗青。

上巳日張元帥令李元帥過船請作書招諭
張少保投拜遂與之言我自救父母不得乃
教人背父母可乎書此詩遺之李不能強持
詩以達張但稱好人好詩竟不能逼

元夕

南海觀元夕茲遊古未曾人間大競渡水上小燒燈世
事爭強弱人情尚廢興孤臣腔血滿死不愧廬陵

懷趙清逸

厓海真何地驅來坐戰場
家人半分合國事決存亡
一死不足道百憂何可當
故人髯似戟起舞為君傷

二月六日海上大戰國事不濟孤臣某坐北舟
中向南痛哭為之詩曰

長平一坑四十萬秦人歡欣趙人怨
大風揚沙水不流為楚者樂為漢
愁兵家勝負常不一紛紛干戈何時畢
必有天吏將明威不嗜殺人能一之
厥角稽首保二州正氣掃地山川羞
身為大臣義當死城下師盟愧牛耳

開關歸國洗日光白麻重宣不敢當出師三年勞且苦
咫尺長安不得覩非無虢虎士如林一日不幸為人擒
樓船千艘下天角兩雄相遭爭奮搏古來何代無戰爭
未有鋒銳交滄溟遊兵日來復日往相持一月為鷁蚌
南人志欲扶崑崙北人志欲黃河吞一朝天昏風雨惡
礮火雷飛箭星落誰雌誰雄勝負分流尸漂血洋水渾
昨朝南船滿厓海今朝只有北船在昨夜兩邊桴鼓鳴
今朝船船鼙睡聲北軍去家八千里椎牛醢酒人人喜

惟有孤臣兩淚垂
冥冥不敢向人啼
六龍杳靄知何處
大海茫茫隔烟霧
我欲借劒斬佞臣
黃金橫帶為何人

又六噫

颶風起兮海水飛
噫文武盡兮火德微
噫鷹鷂欲擊兮
靡所施噫鴻鵠欲舉兮
將安歸噫擢歌中流兮
任所之噫獨抱春秋兮
莫我知噫

言志

九垓化為魅億醜
俘為虜既不能變姓名
卒於吳又不能

髡鉗奴於魯遠引不如四皓翁高蹈不如仲連父冥鴻
墮螭繳長鯨陷網罟鷗燕上下爭誰何螻蟻等門相爾
汝狼藉山河歲云杪飄零海角春重暮百年落落实涯
盡萬里遙遙行役苦我生不辰逢百罹求仁得仁尚何
語一死鴻毛或泰山之輕之重安所處婦女低頭守巾
幘男兒嚼齒吞刀鋸殺身慷慨猶易免取義從容未輕
許仁人志士所植立橫絕地維屹天柱以身殉道不苟
生道在光明照千古素王不作春秋廢烽烟哭騎交中

土閨位適在三七間禮樂終當屬真主李陵衛律罪通天遺臭至今使人吐種瓜東門不可得暴骨匈奴固其所平生讀書為誰事臨難何憂復何懼已矣夫易簣不必如曾參結纓猶當效子路

南海

竭來南海上人死亂如麻腥浪拍心碎颺風吹鬢華一山還一水無國又無家男子千年志吾生未有涯

有感

海濶龍深蟄山空鳥雜鳴花隨春共去雲與水俱行壯
士千年志征夫萬里程夜涼看星斗何處是欃槍

張元帥謂予國已亡矣殺身以忠誰復書之予
謂商非不亡夷齊自不食周粟人臣自盡其
心豈論書與不書張為改容因成一詩

高人名若挽烈士死如歸智滅猶吞炭商亡正採薇豈
因徼後福其肯蹈危機萬古春秋義悠悠雙淚揮

登樓

茫茫地老與天荒如此男兒鐵石腸
七十日來浮海道
三千里外望江鄉
高鴻尚覺心期濶
塞馬何堪跡跡長
獨自登樓時拄頰
山川在眼淚浪浪

海上

天邊青鳥逝海上白鷗馴
王濟非癡叔陶潛豈醉人
得當須報國可隱即逃秦
身事蓋棺定挑燈看劍頻

贛州

滿城風雨送淒涼
三四年前此戰場
遺老猶應愧蜂蟻

故交已久化豺狼江山不改人心在宇宙方來事會長
翠玉樓前天亦泣南音半夜落滄浪

出廣州第一宿

越王臺下路搔首歎萍踪城古都招水山高易得風鼓
聲殘雨後塔影暮林中一樣連營火山同河不同

英德道中

海近山如沃杼深屋半蕪乾坤正風雨軒冕總泥塗自
歎鳶肩薄誰憐鶴影孤少年狂不醒夜夜夢伊吾

晚渡

青山園萬疊流落此何邦
雲靜龍歸海風清馬渡江
灘供茗椀編竹當蓬窻
一井沙頭月羈鴻共影雙

珊瑚吟

南方有珍禽鳴聲天下奇
毛羽黑如漆兩眼凝璫脂
燕趙佳公子籠檻以自隨
童子重丁寧飲食必以時
將獻上林苑來巢萬年枝
待之豈少恩不免加繫維
珊瑚真珊瑚碎琢良自悲
中原寒氣深風土非所宜

和中甫端午韻不依次

黃茅古道外羸馬發南州有客嗤齊虜何人念楚囚歲
年付流水風雨滿滄洲手把菖蒲看黑頭非所求

又呈中齋

風雨羊腸道飄零萬死身牛兒朝共載木客夜為隣庾
子江南夢蘇郎海上貧悠悠看晚渡誰是濟川人

又

萬里論心晚相看慰亂離丹成俄已化璧碎尚無緇

秦西原夢川原落日悲斯文今已矣來世以為期

竹間

倦來聊歇馬隨分此青山流水竹千箇清風沙一灣乾
坤醒醉裏身世有無間客路真希絕浮生半日閒

越王臺

登臨我向亂離來落落千年一越臺春事暗隨流水去
潮聲空逐暮天迴烟橫古道人行少月墮荒村鬼哭哀
莫作楚囚愁絕看舊家歌舞此銜盃

南華山

北行近千里迷復忘西東行行至南華忽忽如夢中佛
化知幾塵患乃與我同有形終歸滅不滅惟真空笑看
曹溪水門前坐松風

六祖禪師真身蓋數百年矣為亂
兵劫其心肝方知有患難佛不免

況人
乎

南安軍

梅花南北路風雨濕征衣出嶺誰同出歸鄉如不歸山
河千古在城郭一時非餓死真吾志夢中行採薇

黃金市

閉蓬絕粒始南州我過青山欲首丘
巡遠應無兒女態夷齊肯作稻梁謀
人間早見黃金市天上猶遲白玉樓
先子神遊今二紀夢中揮淚濺松楸

萬安縣

青山曲折水平平不是南征是北征
舉世更無巡遠死當年誰道甫申生
遙知嶺外相思處不見灘頭惶恐聲
傳語故園猿鶴好夢回江路月風清

泰和

書生曾擁碧油幢
耻與羣兒共豎降
漢節幾回登快閣
楚囚今度過澄江
丹心不改君臣誼
清淚難忘父母邦
惟恐鄉人知我瘦
下帷絕粒坐蓬窓

蒼然亭

風打船頭繫夕陽
亭前老子舊胡牀
青牛過去關山動
白鶴歸來城郭荒
忠節風流落塵土
英雄遺恨滿滄浪
故園水月應無恙
江上新松幾許長

別里中諸友

青山回首風雨暗啼猿楊柳溪頭釣梅花石上尊故人無復見烈士尚誰言長有歸來夢衣冠滿故園

發吉州

已卯六月初一日蒼然亭下楚囚立山河顛倒紛雨泣
乙亥七夕此何夕煌煌牛斗劍光濕戈鋌彗雲雷電擊
三百餘年火為德須臾風雨天地黑皇綱解紐地維折
妾婦偷生自為賊英雄扼腕怒鬚赤貫日血忠死窮北

首陽風流落南國正氣未亡人未息青原萬丈光赫赫
大江東去日夜白

祭羅開禮諸義士

江岸今多嚙城居昔屢焚市人半傖父豎子亦將軍蛟
哭金洲雨猿啼玉觀雲周郎墳土上回首淚成痕

予始至南安即絕粒為告祖禰文別諸友詩遣孫
禮取黃金市登岸馳歸約六月二日復命於吉城
下予以心事白諸幽明即瞑目長往含笑入地矣

乃水盛風駛前一日達廬陵孫禮期不至予且行
忍死以待垂至豐城忽有見孫禮於他舟乃悟竟
不曾往為之痛哭流涕暮始見主者取孫禮還舟
明早遂送之豐城縣縱其自便追之不可及矣予
至是不食已八日若無事然私念死廬陵不失為
首丘今使命不達委身荒江誰知之者盍少須臾
以就義乎復飲食如初昔讀左傳申包胥哭秦庭七
日勺飲不入口亦不聞有他乃知餓路西山非一

朝之積也予嘗服腦子二兩不死絕食八日又不
死竟不曉其何故從者七人或逃或死或逐今僅
存一人曰劉榮楚囚之况宜哉

隆興府

半生幾度此登臨流落而今淚滿簷南浦不知春已晚
西山但覺日初陰誰憐龜鶴千年語空負鷗鵬萬里心
無限故人簾雨外夜深如有廣陵音

湖口

江湖一都會宇宙幾興亡走馬蘆林外買魚茅舍傍南
人撐快槳北客坐危檣江水交岷水東流日夜長

安慶府

風雨宜城路重來白髮新長江還有險中國自無人梟
獍舊遺育鱣鯨螫怒鱗泊船休上岸不忍見遺民

池州

五老湖光遠九華山色昏南冠前進士北部故將軍芳
草江頭路斜陽郭外村怱怱十年夢故國暗銷魂

魯港

方誇金塢築豈料玉牀搖國體真三代江流舊六朝鞭
投能幾日瓦解不崇朝千古燕山恨西風捲怒潮

采石

不上峨眉二十歲重來為墮山河淚今人不見虞允文
古人曾有樊若水長江濶處平如驛况此介然衣帶窄
欲從謫仙捉月去安得燃犀照神物

建康

金陵古會府南渡舊陪京山勢猶盤礴江流已變更健
兒徙幽土新鬼哭臺城一片清溪月偏於客有情

金陵驛

草合離宮轉夕暉孤雲飄泊復何依山河風景元無異
城郭人民半已非滿地蘆花和我老舊家燕子傍誰飛
從今別却江南日化作啼鵲帶血歸

萬里金甌失壯圖衮衣顛倒落泥塗空流杜宇聲中血
半脫驪龍頷下鬚老去秋風吹我惡夢回寒月照人孤

千年成敗俱塵土消得人間說丈夫

懷忠襄

平生王佐心世運蹈衰末齊虜誰復封楚囚詎當脫金陵雖懷古尚友在風烈褒忠侈遺廟夫子我先達

早秋

隻影飄零天一涯千秋搖落欲何之朝看帶緩方嫌瘦夜怯衾單始覺衰眼裏游從驚死別夢中兒女慰生離六朝無限江山在搔首斜陽獨立時

睡起

空堂孤影起聞雞風起高樓鼓角悲江海無情遊子倦
歲年如夢美人遲平生管鮑成何事千古夷齊在一時
坐久日斜庭木落浮雲滅沒漏朝曦

中秋

不教收骨瘡江邊驅向湖沙着去鞭舊奪宮袍空獨步
新食官飯飽孤眠客程恰與秋天半人影何如月倍圓
猶是江南佳麗地徘徊把酒看蒼天

南康軍和東坡酹江月

廬山依舊淒涼處無限江南風物空翠晴嵐浮汗漫還
障天東半壁雁過孤峰猿歸老嶂風急波翻雪乾坤未
歇地靈尚有人傑堪嗟飄泊孤舟河傾斗落客夢催明
發南浦閒雲連草樹回首旌旂明滅三十年來十年一
過空有星星髮夜深愁聽胡笳吹徹寒月

和中齋韻

過吉作

功業飄零五大原如今局促傍誰轅俛眉北去明妃淚

帝血南飛望帝魂骨肉凋殘惟我在形容變盡只聲存
江流千古英雄恨蘭作行舟柳作樊

再和

見說黃沙接五原飄零隻影向南轅江山有恨銷人骨
風雨無情斷客魂淚似空花千點落鬢如碩果數根存
肉飛不起真堪歎江水為籠海作樊

和友人

落落南冠過故都近來我意亦忘吾騎來驛馬身如寄

遣去家書字亦無景伯未囚先立後稽康縱死不為孤
江南只有歸來夢休問田園蕪不蕪

驛中言別友人

水天空濶恨東風不借世間英物蜀鳥吳花殘照裏忍
見荒城頽壁銅雀春情金人秋淚此恨憑誰說堂堂劍
氣斗牛空認奇傑那信江海餘生南行萬里扁舟齊發
正為鷗盟留醉眼細看濤生雲滅晚柱吞羸回旗走懿
千古衝冠髮伴人無寐秦淮應是孤月

和

乾坤能大算蛟龍元不是池中物風雨牢愁無着處那
更寒蟲四壁橫槩題詩登樓作賦萬事空中雪江流如
此方來還有英傑堪笑一葉飄零重來淮水正涼風新
發鏡裏朱顏都變盡只有丹心難滅去去龍沙向江山
回首青山如髮故人應念杜鵑枝上殘月

懷中甫

時中甫以病留
金陵天慶觀

久要何落落末路重依依風雨連兵幕泥塗滿客衣人

間龍虎變天外燕鴻遠死矣煩公傳北方人是非

行宮

中齋

十里宮牆一聚塵天津晚過客愁新花啼杜宇歸來血
樹掛蒼龍脫去鱗福德倘存終有晉秣陵未改已無秦
秋風禾黍空南北見說銅駝會笑人

怪底秦淮一水長幾多客淚洒斜陽江流本是限南北
地氣何曾減帝王臺沼漸荒基歷落鶯花猶在意淒涼
青天畢竟有情否舊月東來失女牆

廣齋謂柳和王昭儀滿江紅韻惜未之見為賦

一闋

中齋作

王母仙桃親曾醉九重春色誰信道鹿銜花去浪翻鰲
闕眉鎖嬌娥山宛轉髻梳墮馬雲歌側恨風沙吹透漢
宮衣餘香歇霓裳散庭花減斜陽燕應難說想春深銅
雀夢啼殘血空有琵琶傳出塞更無環佩鳴歸月又爭
知有客夜悲歌壺敲缺

和王夫人滿江紅韻以庶幾后山妾薄命之意

燕子樓中又捱過幾番秋色相思處青年如夢乘鸞仙
闕肌玉暗銷衣帶緩淚珠斜透花鈿側最無端蕉影上
窓紗青燈歇曲池合高臺滅人間事何堪說向南陽
阡上滿襟清血世態便如翻覆雨妾身元是分明月笑
樂昌一段好風流菱花缺

代王夫人作

試問琵琶胡沙外怎生風色最苦是姚黃一朵移根仙
闕王母慙闌瑤宴罷仙人淚滿金盤側聽行宮半夜雨

淋鈴聲聲歇 彩雲散香塵滅銅駝恨那堪說想男兒
慷慨嚼穿齧血回首昭陽離落日傷心銅雀迎新月
箕
妾身不願似天家金甌缺

王夫人詞

太液芙蓉全不是舊時顏色嘗記得恩承雨露玉堦金
闕名播蘭簪妃后裏暈潮蓮臉君王側忽一朝輦鼓揭
天來繁華歇 龍虎散風雲滅今古恨憑誰說顧山河
百二淚流襟血驛館夜驚塵土夢宮車曉輶關山月若

嫦娥於我肯相容從圓缺

王夫人至燕題驛中云云
中原傳誦惜末句少商量

浪陶沙

中齋

踈雨洗天晴枕簟涼生井梧一葉做秋聲誰念客身輕
似葉千里飄零夢斷古臺城月淡潮平便攜酒訪新
亭不見當時王謝宅烟草青青

東海集序

東海集者友人客海南以來詩也海南詩而曰東海集
者何魯仲連天下士友人之志也友人自為舉子時已

大肆力於詩於諸大家皆嘗登其門而涉其流其本瞻
其養銳故所詣特深到余嘗評其詩渾涵有英氣鍛鍊
如自然美則美矣猶未免有意於為詩也自喪亂後友
人挈其家避地遊官嶺海而全家燬於盜孤窮流落困
頓萬狀然後崖山除禮部侍郎且權直學士矣會南
風不競御舟漂散友人倉卒蹈海者再為北軍所鈎致
遂不獲死以至於今凡十數年間可驚可愕可悲可憤
可痛可悶之事友人備嘗無所不至其慘戚感慨之氣

結而不信皆於詩乎發之蓋至是動乎情性自不能不
師杜子美夔門柳子厚柳州以後文字也余與友人年
相若又同里閑以斯文相好然平生落落不相及及居
楚囚中而友人在行同患難者數月其自五羊至金陵
所賦皆予目擊或相唱和詩余坐金陵驛無所作為乃
取友人諸詩筆之於書與相關者并附焉後之覽者因
詩以見吾二人之志其必有感慨於斯已外七月壬申
文某叙

送行中齋三首

秋氣晚正烈客衣早知寒把衣不能別更盡此日歡出門一萬里風沙浩漫漫豈無兒女情為君思汎瀾百年有時盡千載無餘觀明明君臣義公獨為其難願持丹一寸寫入青琅玕會有撫卷人孤燈起長歎

神龍蕩失水馴擾終未得威鳳雖在藪肯願雞鶩食所以古之人受變心不易毫鼎已遷周西山竟肌瘠豫子身自漆萇弘血成碧何嘗怨廢興而或貳心跡堅白不

在緇裘良自惜此誼公素明俗見或未識

嗟予抱區區疇昔同里閭過從三十年知心不知面零
落忽重逢家亡市朝變惻惻蹈海餘踽踽南冠殿劇談
泥塗際握手鞍馬倦依依斯文意苦恨十年晚魯仲偶
不逢隨世本非願靈胥目未抉端欲詣所見及茲萬里
別一夕腸百轉余生諒須臾孤感橫九縣庶幾太尉事
萬一中丞傳

此冊為指南後錄第一卷下第二卷起八月二十

四日發建康終歲除有感尚有零丁洋諸詩及後
錄本在惠州合隸為一卷而所恨者指南前錄叙
號存而詩已不完侍郎第姑據所存本使不泯於
世一聯半句使天下見之識其為人即吾死無憾
矣况篇帙之多乎歲在庚辰正月二十日文山履
善甫書

指南後錄二

予後錄詩以廣州至金陵為第一今入淮以後為

第二卷云

發建康

八月二十四日

賞心亭下路拍手唱吾歌樓外梁時塔城中秦氏河江山如夢耳天地奈愁何回首青溪雨長江一雁過

江行有感

二十五日

蒲萄肥汗馬荊棘冷銅駝巫峽朝雲濕洞庭秋水波窮愁空哭兀暗淚自滂沱莫恨吾生悞江東才俊多

真州驛

二十七日

山川如識我故舊更無人俯仰干戈跡往來車馬塵英雄遺寡晚天地暗愁新北首燕山路淒涼夜向晨

望揚州

阮籍臨廣武杜甫登吹臺高情發慷慨前人後人哀江左遘陽運銅駝化飛灰二十四橋月楚囚今日來

維揚驛

三年別淮水一夕宿揚州南極山川古北風江海秋昭君愁出塞王粲怕登樓千載英雄淚如今況楚囚

過邵伯鎮

二十
八日

今朝車馬地昔日戰爭場
我有揚州鶴誰存邵伯棠
一灣流水小數畝故城荒
回首江南路青山斷夕陽

高郵懷舊

二十
九日

借問曾遊處高沙第幾山
潛行鷹攫道直上虎當關
一命虛空裏三年瞬息間
自憐今死晚何復望生還

發高郵

三十
日

初出高沙門輕舫遠城樓
一水何曲折百年此綢繆
北

望渺無際飛鳥翔平疇寒蕪入荒落日薄行人愁行行
行湖曲萬頃涵清秋大風吹檣倒如盪彭蠡舟欲寄故
鄉淚使入長江流爲人爲我言此水通淮頭前與黃河
合同作滄海漚踟躕忽失意拭淚淚不收吳會日已遠
回首重悠悠馳驅梁趙郊壯士何離憂吾道久已東陸
沈古神州我今戴南冠何異有北投不能裂肝腦直氣
摩斗牛但願光岳合休明復商周不使殊方魄終爲異
物羞

寶應道中

天濶搏南雁淮途長北驅甘棠成傳舍細柳作康衢
田海隨時變山河往日殊征袍共袞繡夜壁一燈孤

淮安軍

九月一日

楚州城門外白楊吹悲風累累死人塚死向鋒鏑中
豈無匹婦寃定無萬夫雄中原在其北登城望何窮

過淮河宿闕石有感

北征垂半年依依只南土今晨渡淮河始覺非故宇
江

鄉已無家三年一羈旅龍翔在何方乃我妻子所昔也
無奈何忽已置念慮今行日已近使我淚如雨我為網
常謀有身不得顧妻兮莫望夫子兮莫望父天長與地
久此恨極千古來生業緣在骨肉當如故

發淮安

九月
二日

九月初二日車馬發淮安行行重行行天地何不寬烟
火無一家荒草青漫漫恍如泛滄海身坐玻璃盤時時
逢北人什伍扶征鞍云我戍江南當軍身屬官北人適

吳楚所憂地少寒江南有遊子風雪上燕山

小清江

初三日

乍見驚胡婦相嗟遇楚兵北來鴻雁密南去駱駝輕芳草中原路斜陽故國情明朝五十里錯做武陵行

桃源道中

初四日

漠漠地千里垂垂天四圍隔溪征騎過傍草野雞飛風露吹青笠塵沙薄素衣吾家白雲下都伴北人歸

桃源縣

清野百年久中原千里餘
火烟新聚落山水舊生涯
種麥數十畝誅茅千百家
我來行正倦何處覓桃花

崔鎮驛

萬里中原後北風天正涼
黃沙漫道路蒼耳滿衣裳
野濶人聲小日斜駒影長
解鞍身似夢遊子意茫茫

發崖鎮

初五日

高雁空秋興寒蛩破曉眠
淡烟白似海野水碧於天
興廢嗟何及行藏信自然
南人乍騎馬北客半乘船

發宿遷縣

夜夢入星槎曉行隨斗柄衣暖露自乾鬢寒冰欲凝將
軍戴鐵笠壯士敲金鐙白眼睨青天我生不有命

中原

中原方萬里明日是重陽桑棗人家近蓬蒿客路長引
弓虛射雁失馬為尋羊見說今年旱青青麥又秧

望邳州

初六日

中原行幾日今日才見山問山在何處云在徐邳間邳

州山徐州水項藉不還韓信死龍爭虎鬪不肯止烟草
漫漫青萬里古來劉季號英雄樊崇至今已千歲

徐州道中

初七日

彭城古官道日中十馬馳咫尺不見人撲面黃塵飛向
來漢王縞素師美人燕罷項羽啼一時混戰四十萬天
昏地黑睢水湄乃知大風揚沙失白晝自是地利非天
時漢王倉皇問道西一兒一女嘻其危太公呂后去不
歸姐上寧有生還時未央稱壽太上皇巍然女媧帝中

閹終然富貴自有命造物顛倒真小兒

彭城行

徐州彭城縣

連山四圍合呂梁貫其中河南大都會故有項王宮晉
牧連揚豫虎視北方雄唐時燕子樓風流張建封西望
睢陽城只與汴水通太平黃樓賦尚能想遺風爾來百
餘年正朔歸江東遺民死欲盡莽然狐兔叢我從南方
來停驂撫遺蹤故河蓄潢潦荒城翳秋蓬淒涼戲馬臺
憔悴巨佛峯滄海變桑田陵谷代不同朝為朱門貴暮

作行旅窮乘除信物理感慨繫所逢古來賢達人一醉
萬慮空如此獨醒何悲風逐征鴻

燕子樓

自別張公子嬋娟不下樓遂令樓上燕百歲稱風流我
遊彭城門來弔楚王闕問樓在何處城東草如雪蛾眉
代不乏埋沒安足論因何張家妾名與山川存自古皆
有死忠義長不沒但傳美人心不說美人色

戲馬臺

九月初九日客遊戲馬臺黃花弄朝露古人化飛埃今
人哀後人後人復今哀世事那可及淚落茱萸杯

發彭城

今朝正重九行人意遲遲回首戲馬臺野花發歲蕤草
埋范增塚雲見樊噲旗時節正如此道德將何之我愛
陶淵明甲子題新詩白衣送酒來把菊卧東籬

沛歌

山東藤山沛
縣初十日

秦世失其鹿豐沛發龍顏王侯與將相不出徐濟間當

時數公起四海王氣閒至今尚想見虹光照人寰我來
千載下弔古淚如潛白雲落荒草隱隱芒碭山黃河天
下雄南去不復還乃知盈虛故天道如循環盧王舊封
地今日殺函關

歌風臺

長陵有神氣萬歲光如虹有時風雪變魂魄來沛宮壯
哉遊子鄉一覽萬宇空擊筑戒復隍帝業慎所終重瞳
愛梁父此情豈不同錦衣絢行畫丈夫何淺中緬懷首

丘意自足分雌雄尚惜霸心存慷慨懷勇功不見往來
事烹狗與藏弓早知致兩生禮樂三代隆匹夫事已往
安用責乃翁我來湯沐邑白楊吹悲風永言三侯章隱
隱聞兒童葉落皆歸根飄零獨秋蓬登臺共悽惻目送
南飛鴻

固陵道中

九天雲下垂一雨作秋色塵埃化泥塗原野轉蕭瑟十
里一雙堠狐兔卧荆棘見說數年來中州乍蘇息

又

茅舍荒涼舊固陵
漢王城對楚王城
徐州烟火連豐沛
天下還來屋角爭

固陵城下兩龍爭
不見齊王來會兵
勒取河山新分地
項王之後到韓彭

發魚臺

十二日

晨炊發魚臺
碎雨飛擊面
團團四野周
冥冥萬象變
疑是江南山
烟霧昏不見
豈知此中原
今古經百戰
英雄

化為土飛霧洒郊甸天寒日欲短游子淚如霰

自歎

瑟瑟秋風悲烈烈寒氣驕蒲柳先已零松柏何後凋天
意重肅殺造物無不銷強弱有異稟憂患同一朝惟有
南山石千歲一岿堯人苦不自足空羨王子喬

遠遊

黃河流活活太行高巍巍王屋山以東百泉山以西鄒
魯盛文獻燕趙多雄姿右摩泰山碑左躡函谷泥邾鄆

弔周公曲阜拜宣尼或登廣武歎或上北邙啼平生幾
兩屐汗漫以為期絕交天下士要為男子奇吳會徧王
業中原隔遺黎安得與黃鶴比翼天上飛江河異風景
擊揖感且歛陽運遣百六興否俄推移桑田變滄海楚
囚發孔悲我本檻車客為我解繫維青蠅附天驥萬里
相追隨人生尚行樂矧復新相知周道思下泉王風懷
黍離富貴豈不願憂患那自持人命危且賤忽若朝露
晞長恐折我軸中道欲差池去我父母邦我行且遲遲

聽我遠遊曲寄我長相思

六歌

有妻有妻出糟糠自少結髮不下堂
亂離中道逢虎狼
鳳飛翩翩失其凰將雛一二去何方
豈料國破家亦亡
不忍舍君羅襦裳
天長地久終茫茫
牛女夜夜遙相望
嗚呼一歌兮歌正長
悲風北來起彷徨

有妹有妹家流離
良人去後攜諸兒
北風吹沙塞草淒
窮猿慘淡將安歸
去年哭母南海湄
三男一女同歔歔

惟汝不在割我肌汝家零落母不知母知豈有瞑目時
嗚呼再歌兮歌孔悲鵲鵲在原我何為

有女有女婉清揚大者學帖臨鍾王小者讀字聲琅琅
朔風吹衣白日黃一雙白璧委道傍雁兒啄啄秋無梁
隨母北首誰人將嗚呼三歌兮歌愈傷非為兒女淚淋
浪

有子有子風骨殊釋氏抱送徐卿雛四月八日摩尼珠
榴花犀錢絡繡襦蘭湯百沸香似酥歛隨飛電飄泥塗

汝兄十三騎鯨魚汝今知在三歲無嗚呼四歌兮歌以
吁燈前老我明月孤

有妾有妾今何如大者手將玉蟾蜍次者親抱汗血駒
晨妝靚服臨西湖英英雁落飄瑤琚風花飛墜鳥嗚呼
金莖沆瀣浮汙渠天摧地裂龍鳳殂美人塵土何代無
嗚呼五歌兮歌鬱紆為爾遡風立斯須

我生我生何不辰孤根不識桃李春寒日短重愁人
北風隨我鐵馬塵初憐骨肉鍾奇禍而今骨肉相憐我

汝在北兮嬰我懷我死誰當收我骸人生百年何醜好
黃梁得喪俱草草嗚呼六歌兮勿復道出門一笑天地
老

發潭口

十三日

吹面北風來拂鬢堅冰至軒冕委道途袞繡易羶毳百
年雜醜好始酌四方志浩歌激浮雲亭亭復攬轡義馭
幾曾停誰當掃幽翳

新濟州

借問新濟州徐鄆兄弟國昔為大河南今為大河北垂
雲陰萬里平原望不極百草盡枯死黃花自秋色時時
見桑樹青青雜阡陌路上無人行烟火渺蕭瑟車轍分
縱橫過者臨岐泣積潦流交衢霜蹄破叢棘江南寒未
深銅爐獸花赤為知行路人鐵冷衣裳濕

汶陽道中

東平路汶陽縣十四日

積雨不肯霽行陸如涉川青氈纈我後白氈覆我前我
欲正衣冠兩手如糾纏飛沫流被面代我泣涕漣鴻雁

紛南朔遊子北人燕平楚渺四極雪風迷遠天昔聞濟
上軍又說汶陽田我今履其地弔古愴蒼烟男兒欲了
事長虹射寒泉

汶陽館

去歲營舡隩今朝館汶陽海空沙漠漠河廣草茫茫家
國哀千古男兒慨四方老槐秋雨暗孤影照淋浪

自汶陽至鄆

日十五

渺渺中原道勞生歎百非風雨吹打人泥濘飛上衣目

力去天短心事與時違夫子昔相魯侵疆自齊歸

來平館

憔悴江南客蕭條古鄆州雨聲連五日月色徹中流萬
里山河夢千年宇宙愁欲鞭劉豫骨烟草暗荒丘

發鄆州喜晴

烈風西北來萬竅號高秋宿雲蔽層空浮潦迷中州行
人苦沮洳道阻路且修流澌被鞍轡飛沫綴衣裘昏鴉
接翅落原野慘以愁城郭何蕭條閉戶寒颼颼中宵月

色滿餘光散衾裯余子戒明發飛霧霽郊丘微見扶桑
紅隱隱如沉浮身遊大荒野海氣吹蜃樓須臾劃當空
六合開沉幽千年厭顏色蒼翠光欲流太陽經天行大
化不暫留輝光何曾滅晝霽終當收嚴霜下豐草長歌
夜悠悠明日東阿道方軌驟驂騑

發東阿

十七日

東原深處所時或見人烟秋雨桑麻地春風桃李天貪
程頻問堠快馬緩加鞭多少飛檣過噫吁是北船

宿高唐州

博州

早發東阿縣暮宿高唐州
哲人達幾微志士懷隱憂
山河已歷歷天地空悠悠
孤館一夜宿北風吹白頭

平原

十八日

平原太守顏真卿長安天子不知名
一朝漁陽動輦鼓大江以北無堅城
公家兄弟奮戈起一十七郡連夏盟
賊聞失色分兵還不敢長驅入咸京
明皇父子將西狩由是靈武起義兵
唐家再造李郭力若論牽制公威靈

哀哉常山慘鉤舌心歸朝廷氣不懾崎嶇坎坷不得志
出入四朝老忠節當年幸脫安祿山白首竟陷李希烈
希烈安能遽殺公宰相盧杞欺日月亂臣賊子歸何處
茫茫烟草中原土公死於今六百年忠精赫赫雷當天
發陵州

中原似滄海萬頃與雲連大明朝東出皎月正在天遠
樹亂如點桑麻鬱蒼烟一雁入高空千鴉落平田我行
天地中如蟻磨上旋雨痕留故衣霜氣襲重氊健馬嘶

北風潛魚樂深淵噫哉南方人回首空自憐

獻州道中

三年戎服行五嶺文玉會攀躋上崖磴厲揭涉瀟瀨十
步九崎嶇山水何破碎坐令管仲小自覺伯夷隘乃今來
中州萬里如一槩四望登原隰桑麻蔚旆旆驂騑出清
廟過都真歷塊歷歷古戰場俯仰生感慨吾常涉重湖
東海際南海茲遊冠平生天宇更宏天心與太虛際目
空九圍內男兒不出居婦人坐帷蓋反身以自觀須彌

納一芥以此處死生超然萬形外

滹沱河二首

過了長江與大河橫流數仞絕滹沱
蕭王麥飯曾倉卒回首中天感慨多

風沙睢水終亡楚草木公山竟盛秦
始信滹沱冰合事世間興廢不由人

河間

夜宿河間恰家則翁寓焉因成三絕

空有丹心貫碧霄
泮冰亡國不崇朝
小臣萬死無遺慨
曾見天家十八朝

南歸雁蕩報郎君
老子精神健十分
不為瀛洲復相見
阿戎翻隔萬山雲

江南車蓋走燕山
老子旁觀袖手閒
見說新詩題甲子
桃源元只在人間

保州道中

二十一日

昨夜渡滹沱
今日望太行
白雲何渺渺
天地何茫茫
落落

葉混西風黃塵昏夕陽牛車過不住羶屋行相望小兒
騎蹇驢壯士駕乘黃高低葉萬頃黑白草千行村落有
古風人間無時妝宋遼舊分界燕趙古戰場蚩尤亂涿
野共工謫幽邦郭隗致樂毅荆軻攜舞陽滅盧互反覆
安史迭披猖山川一今古人物幾興亡江南佔畢士往
來習羊腸天馬戴青蠅電秣馳康莊適從何有來如此
醉夢鄉感時意踟躕惜往淚淋浪厲階起玉環左許右
石郎天地行日月萬代乘景光晝夜果可廢春秋誠荒

唐吾生直須臾俯仰際八荒來者不可見遠遊賦彷徨

保涿州三詩

趙太祖墓

在保州 二十九年
日起三十日到

我行保州塞御河直其東山川猶有靈佳氣何鬱蔥
我巾車囚厲氣轉秋蓬瓣香欲徃拜惆悵臨長空

樓桑

故宅近涿
縣三十里

我過梁門城樓桑在其北元德已千年青烟遶故宅道
傍為揮淚徘徊秋風客天下卧龍人多少空抱膝

涿鹿

我瞻涿鹿野古來戰蚩尤
軒轅此立極玉帛朝諸侯
歷歷關河雁隨風鳴寒秋
邇來三千年王氣行幽州

過梁門

一一金甌在雙雙鎮壁全
土花開舊國風絮渡江船
南北分新統江淮號極邊
更和天塹失回首慘啼鵑

白溝河

昔時張叔夜統兵赴勤王
東都一不守羸馬遷龍荒
適

過白溝河裂背鬚欲張絕粒不遺死仰天扼其吭羣臣
總奄奄一土垂天光讀史識其地撫卷為淒涼我生何
不辰異世忽相望皇圖遘陽九天塹滿飛堙引兵詣闕
下捧土障瀾狂出使義不屈持節還中郎六飛獨南海
金鉞將煌煌武侯空威心出狩驚四方吾屬竟為擄世
事吁彼蒼思公有奇節一死何慨慷江淮我分地我欲
投滄浪滄浪却不受中原行路長初登項籍宮次覽劉
季邦涉足河與濟回首嵩與恒下車撫梁門上馬指樓

桑戴星渡一水慘淡天微茫行人為我言宋遼此分疆
懸知公死處為公出涕滂恨不持束芻徘徊官道傍我
死還在燕烈烈同肝腸今我為公哀後來誰我傷天地
垂日月斯人未云亡文武道不墜我輩終堂堂

懷孔明

斜谷事不濟將星殞營中至今出師表讀之淚沾胸漢
賊明大義赤心貫蒼穹世以成敗論操懿真英雄

劉琨

中原蕩分崩壯哉劉越石連蹤起幽并隻手扶晉室福
華天意乖匹礪生鬼蜮公死百世名天下分南北

祖逖

平生祖豫州白首起大事東門長嘯兒為遜一頭地何
哉戴若思中道奮螳臂豪傑事垂成今古為短氣

顏杲卿

常山義旗奮范陽哽喉咽胡雛一狼狽六飛入西川哥
舒降且拜公舌膏戈鋌人世誰不死公死千萬年

許遠

起師哭元元義氣震天地百戰奮雄姿
嚮安士揮淚睢陽水東流雙廟垂百世
當時令狐潮乃為賊遊說

過雪橋琉璃橋

小橋度雪度琉璃更有清霜滑馬蹄
遊子衣裳和鐵冷

殘星荒店野雞啼

一作亂鳴雞

文山集卷十九

欽定四庫全書

文山集卷二十

宋 文天祥 撰

指南後錄三

予指南後錄第一卷起正月十二日賦零丁
洋第二卷起八月二十四日發建康今第三
卷蓋自庚辰元日為始文山履善甫序

五月二日生朝

北風吹滿楚冠塵笑捧蟠桃夢裏春幾歲已無籠鶻客
去年猶有送羊人江山如許非吾土宇宙奈何多此身
不滅不生又何許靜中聊且養吾真

胡笳曲

庚辰中秋日水雲慰予囚所援琴作胡笳十
八拍取予疾徐指法良可觀也琴罷索予賦
胡笳詩而倉卒中未能成就水雲別去是歲
十月復來予因集老杜句成拍與水雲共商

略之蓋圉圉中不能得死聊自遣耳亦不必
一一學琰語也水雲索予書之欲藏於家故
書以遺之浮休道人文山

風塵瀕洞昏王室天地慘慘無顏色而今西北自反胡
西望千山萬山赤歎息人間萬事非被驅不異犬與雞
不知明月為誰好來歲如今歸未歸

右一拍

獨立縹緲之飛樓高視乾坤又何愁江風蕭蕭雲拂地

笛聲憤怒哀中流鄰雞野哭如昨日
昨日晚晴今日黑
倉皇已就長途往欲往城南忘南北

右二拍

三年奔走空皮骨三年笛裏關山月
月中天月色好誰看
豺狼塞路人烟絕寒刮飢膚北風利牛馬毛零縮如蝟
塞上風雲接地陰咫尺但愁雷雨至

右三拍

黃河北岸海西軍翻身向天仰射雲胡馬長鳴不知數

衣冠南渡多崩奔山木慘慘天欲雨前有毒蛇後猛虎
欲問長安無使來終日戚戚忍羈旅

右四拍

北庭數有關中使飄飄遠自流沙至胡人高鼻動成羣
仍唱胡歌飲都市中原無書歸不得道路只今多擁隔
身欲奮飛病在牀時獨看雲淚沾臆

右五拍

胡人歸來血滿箭白馬將軍若雷電蠻夷雜種錯相干

洛陽宮殿燒焚盡干戈兵革鬪未已
魑魅魍魎徒為爾
慟哭秋原何處村千村萬落生荆杞

右六拍

憶昔十五心尚孩莫恠頻頻勸酒杯
孤城此日腸堪斷
如何不飲令人哀一去紫臺連朔漠
月出雲通雪山白
九度附書歸洛陽故國三年一消息

右七拍

只今年纔十六七風塵荏苒音書絕
胡騎長驅五六年

弊裘何啻連百結愁對寒雲雪滿山愁看冀北是長安
此身未知歸定處漂泊西南天地間

右八拍

午夜漏聲催曉箭寒盡春生洛陽殿漢主山河錦繡中
可惜春光不相見自胡之反持干戈一生抱恨空咨嗟
我已無家尋弟妹此身那得更無家南極一星朝北斗
每依南斗望京華

右九拍

今年鵬月凍全消天涯涕淚一身遥諸將亦自軍中至
行人弓箭各在腰白馬嚼嚙黃金勒三尺角弓兩斛力
胡雁翅濕高飛難一箭正墜雙飛翼

右十拍

冬至陽生春又來口雖吟咏心中哀長笛誰能亂愁思
呼兒且覆掌中杯雲白山青萬餘里壁立石城橫塞起
元戎小隊出郊垌天寒日暮山谷裏

右十一拍

洛陽一別四千里邊庭流血成海水自經喪亂少睡眠
手脚凍皴皮肉死反鎖衡門守環堵稚子無憂走風雨
此時與子空歸來喜得與子長夜語

右十二拍

大兒九齡色清徹驂騑作駒已汗血小兒五歲氣食牛
冰壺玉衡懸清秋罷琴惆悵月照席人生有情淚沾臆
離別不堪無限意更為後會知何地酒肉如山又一時
只今未醉已先悲

右十三拍

北歸秦川多鼓鼙禾生隴畝無東西
三步回頭五步坐誰家搗練風淒淒
已近苦寒月慘慘中腸悲自恐二男
兒不得相追隨去留俱失意徘徊感
生離十年蹴踘將雛遠目極傷神誰
為攜此別還須各努力無使霜露沾
人衣

右十四拍

寒雨颯颯枯樹濕坐卧只多少行立
青春欲暮急還鄉

非關使者徵求急欲別上馬身無力去住彼此無消息
關塞蕭條行路難行路難行澁如棘男兒性命絕可憐
十日不一見顏色

右十五拍

乃知貧賤別更苦況我飄轉無定所心懷百憂復千慮
世人那得知其故嬌兒不離膝哀哉兩決絕也復可憐
人里巷盡嗚咽斷腸分手各風烟中間消息兩茫然自
斷此身体問天看射猛虎終殘年

右十六拍

江頭宮殿鎖千門
千家今有百家存
面脂首飾雜啼痕
教我歎恨傷精魂
自有兩兒即忽在天
一方胡塵暗天
道路長安得送我
置汝傍

右十七拍

事殊興極憂思集
足繭荒山轉愁疾
漢家山東二百州
青是烽烟白人骨
入門依舊四壁空
一斛舊水歲蛟龍
年過半百不稱意
此曲哀怨何時終

右十八拍

上已

予自丙子上巳日真州屏之城門外予今憂
患通六年俯仰時節為之慨然

昔自長淮樹去帆今從燕薊眺東南泥沙一命九分九
風雨六年三月三地下故人那可作天涯遊子竟何堪
便從餓死傷遲暮面對西山已發慚

寒食

予不登丘隴拜清明寒食八年矣癸酉湖南
甲戌乙亥章貢丙子淮東丁丑梅州戊寅麗
江浦庚寅燕山獄中今辛巳猶未得死和上
巳韻寫懷

苦海周遭斷去帆東風吹淚向天南龍蛇澤裏清明五
燕雀籠中寒食三撲面風沙驚我在滿襟霜露痛誰堪
何當歸骨先人墓千古不為丘首慚

覽鏡見鬚髯消落為之流涕

萬里飄零等一毫
滿前風景恨滔滔
淚如杜宇喉中血
鬚似蘇郎節上旄
今日形骸遲一死
向來事業竟徒勞
青山是我安魂處
清夢時時賦大刀

讀赤壁賦前後二首

昔年仙子謫黃州
赤壁磯頭汗漫遊
今古興亡真過影
乾坤俯仰一虛舟
人間憂患何曾少
天上風流更有不
我亦洞簫吹一曲
不知身世是蜉蝣

一笑滄波浩浩流
隻鷄斗酒更扁舟
八龍寫作詩中案

孤鶴來為夢裏遊楊柳遠烟連北府蘆花新月對南樓
玉仙來往清風夜還識江山似舊不

自歎

門掩牢愁白日過不應老子坐婆婆雖生得似無生好
欲死其如不死何王蠋高風真可挹魯連大節豈容磨
東流不盡銅駝恨四海悠悠總一波

端午初度

死所初何怨生朝只自知頗懷常杖意忍誦蓼莪詩浮

世百年夢高人千載期楚囚一杯水勝似九霞卮
向來松下鶴今日傍誰門夢見瑤池沸愁看玉壘昏所
思多死所焉用獨生存可惜菖蒲老風烟滿故園

端午即事

五月五日午贈我一枝艾故人不可見新知萬里外丹
心照夙昔髻髮日已敗我欲從靈均三湘隔遼海

自述二首

當年嚼血灑銅駝風氣悠悠奈若何漢賊已成千古恨

楚囚不覺二年過閒來誰似天隨子老去忽如春夢婆
試把睢陽雙廟看只今事業愧蹉跎

江南啼血送殘春漂泊風沙萬里身漢末固應多死士
周餘乃止一遺民乍看鬚少疑非我只要心存尚是人
坐擁牢愁書眼倦土牀伸脚任吾真

五月十七夜大雨歌

去年五月望流水滿一房今年後三夕大雨復沒牀我
辭江海來中原路茫茫舟楫不復見車馬馳康莊矧居

園土中得水猶得漿忽如避巨浸倉卒殊徬徨明星尚
未啓大風方發狂叫呼人不應宛轉水中央壁下有水
穴羣鼠走踉蹌或如魚潑刺墊溺無所蔽周身莫如物
患至不得防業為世間人何處逃禍殃朝來開溝道宛
如決陂塘盡室泥濘塗化為糜爛場炎蒸迫其上臭腐
薰其傍惡氣所侵薄疫癘何可當楚囚欲何之寢食此
一方羈棲無復望坐待仆且僵乾坤莽空闊何為此涼
涼達人識義命此事關綱常萬物方焦枯皇皇禱穹蒼

上帝實好生夜半下龍章但願天下人家家足稻粱我
命渾小事我死庸何傷

先太師忌日

二月二十八

萬里先人忌呼號痛不天遺孤餘二紀曠祀忽三年永
恨丘園隔遙憐弟妹圓義方如昨日地下想欣然

築房子歌

自予居狴犴一室以自治二年二大雨地汙實成池圉
人為我側畚土以築之築之可二尺宛然水中坻初運

朽壤來臭穢恨莫追掩鼻不可近牛皂鷄于埒須臾傳
黑墳千村鳴參差但見如坻平糞土不復疑乃知天下
事不在論鎡基苟可掩耳目臭腐誇神奇世人所不辨
羊質而虎皮大者莫不然小者又何知深居守我玄默
觀道推移何時蟬蛻去忽與濁世違

有感

已矣勿復道安之如自然閒陪黃妳坐倦退白衣眠一
死知何地此生休問天怪哉茨野客宿果墮幽燕

正氣歌

予囚北庭坐一土室室廣八尺深可四尋單
扉低小白間短窄汙下而幽暗當此夏日諸
氣萃然雨潦四集浮動牀几時則為水氣塗
泥半朝蒸漚歷瀾時則為土氣乍晴暴熱風
道四塞時則為日氣簷陰薪爨助長炎虐時
則為火氣倉腐寄頓陳陳逼人時則為米氣
駢肩雜還淋漓汗垢時則為人氣或圓溷或毀屍

或腐鼠惡氣雜出時則為穢氣壘是數氣當
之者鮮不為厲而予以孱弱俯仰其間于茲二年
矣審如是殆有養致然爾然亦安知所養何哉
孟子曰我善養吾浩然之氣彼氣有七吾氣
有一以一敵七吾何患焉況浩然者乃天地
之正氣也作正氣歌一首

天地有正氣雜然賦流形下則為河嶽上則為日星於
人曰浩然沛乎塞蒼冥皇路當清夷含和吐明庭時窮

節乃見一一垂丹青在齊太史簡在晉董狐筆在秦張
良椎在漢蘇武節為嚴將軍頭為嵇侍中血為張睢陽
髯為顏常山舌或為遼東帽清操厲冰雪或為出師表
鬼神泣壯烈或為渡江楫慷慨吞羌羯或為擊賊笏逆
豎頭破裂是氣所磅礴烈萬古存當其貫日月生死
安足論地維賴以立天柱賴以尊三綱實係命道義為
之根嗟予遘陽九隸也實不力楚囚纓其冠傳車送窮
北鼎鑊甘如飴求之不可得陰房闐鬼火春院閤天黑

牛驥同一皂雞棲鳳凰食一朝濛霧露分作溝中瘠如
此再寒暑百沴自辟易嗟哉沮如塲為我安樂國豈有
他繆巧陰陽不能賊顧此耿耿在仰視浮雲白悠悠我
心悲蒼天曷有極哲人日已遠典刑在夙昔風簷展書
讀古道照顏色

七月二日大雨歌

燕山五六月氣候苦不常積陰綿五旬畏景淡無光天
漏比西極地濕等南方今何苦常雨昔何苦常暘七月

二日夜天工為誰忙浮雲黑如墨飄風怒如狂滂沱至
夜半天地為低昂勢如蛟龍出平陸俄懷襄初疑倒巫
峽又似翻瀟湘千門各已閉仰視天茫茫但聞屋側聲
人力無支當嗟哉此圉土占勝非高岡赭衣無容足南
房并北房北房水二尺聚立唯東廂桎梏猶自可凜然
覆窮牆嘈嘈復雜雜烝汗流成漿張目以待旦沈沈漏
何長南冠者為誰獨居沮洳塲此夕水彌滿浮動八尺
牀壁老如欲壓守者殊皇皇我方軒鼻睡逍遙遊帝鄉

百年一大夢所歷皆黃梁死生已勘破身世如遺忘雄
雞叫東白漸聞語聲揚論言苦飄蕩形勢猶倉黃起來
立泥塗一笑褰衣裳遺書宛在架吾道終未亡

詠懷

陰陽相烹煎天地一釜瀹人生居其間便同肉在砧熱
猶以火燎濕猶以湯燖一歲一燉煉老形忽駸駸吾生
四十六弱質本不任矧當五六年患難長侵尋子卿羝
羊節少陵杜鵑心酷罰毒我膚深憂煩我襟嗟嗟夏涉秋

天道何其淫或時日杲杲或時雨淋淋方如坐烝甑又
似立烘燂水火交相裨益熱與益深宛轉兒戲中日夜
空呻吟何如真鼎鑊殊我一寸金脫此寒暑殼誰能復
嶮嶮

偶成

昨朝門前地寸裂今朝牀下泥尺深人生世間一蒲柳
豈堪日炎復雨淋起來高歌離騷賦睡去細和梁父吟
已矣已矣復何道猶有天地知吾心

移司即事

自大雨後兵馬司牆壁頽落地皆沮洳囚不可居七月五日移司官籍監予以詰朝行詩以記之

燕山積雨泥塞道大屋歆傾小屋倒赭衣棘下無容色
倉卒移司避流潦行行桎梏如貫魚憐我龍鍾遲明早
我來二十有一月若書下下幾二考夢回恍憶入新衙
不知傳舍何時了幸有癡兒了家事九牛一毛亦云小

天門皇皇虎豹立下土孤臣泣雲表莫令赤子盡為魚
早願當空日杲杲

不睡

頻搔白首強憂煎細雨青燈思欲顛南北東西三萬里
古今上下幾千年只因知事翻成惱未到放心那得眠
眼不識丁馬前卒隔牀鼾鼻正陶然

官籍監

兵馬司移寓官籍監予監一室頗瀟洒明窓

淨壁樹影橫斜可愛也賦五絕

塵滿南冠歲月深
斲移一室倚旃林
天憐元是青山客
分與窓根兩樹陰

壁間頗自有龍蛇
元是誰人小住家
不似為囚似為客
倚窓望斷暮天涯

曾過盧溝望塔尖
今朝塔影接虛簷
道人心事真方大
靜坐日長雲滿簾

軍衙馬足起黃埃
門掩西風夢正回
自入燕關人世隔

隔牆忽送市聲來

新來窓左頗玲瓏盡把前時臭腐空好醜元來都是幻
蘆廬一付夢魂中

還司即事

兵馬司苦於地窄其東偏有大宅官買之以
廣治所舊廳事遂為空閒七月十一日囚自
官籍監悉歸獄舊廳事之西有一室處予其間
其地高燥而空涼蕭然獨往寂無來人又一

境界也五言八句二首

幙燕方如寄屠羊忽復旋
霜枝空獨立雪害已三遷
漂泊知何所逍遙付自然
庭空誰共語拄頰望青天

秋聲滿南國一葉此飄蓬
牆外千門迴庭臯四壁空
誰家驢吼月隔巷犬吠風
燈暗人無寐沉沉夜正中

夜起二首

惆悵高歌入睡鄉夢中
魂魄尚飛揚起來露立頻搔首
夜靜無風自在涼

三年獨立已成僧欲與何人說葛藤夜夜隔牆囚叫佛
三生因果伴孤燈

還獄

予自官籍監還兵馬司止予舊廳事西偏之
室獄戶既葺以八月七日復返故處向之所
謂臭腐濕蒸依然故在回視吾所挾亦浩然
而獨存作古風一首

人情感故物百年多離憂桑下住三宿應者猶遲留矧

茲方大室屏居二春秋夜眠與晝坐墮乎安楚囚自罹
大雨水園土俱盪舟此身委傳舍遷徙無定謀去之已
旬月宮室重綢繆今夕果何夕復此搔白頭恍如流浪
人一旦歸舊游故家不可復故國已成丘對此重回首
汪然涕泗流人生如空花隨風任飄浮哲人貴知命樂
天復何求

偶賦

蒼蒼已如此梁父共誰吟袖有忠臣傳牀無壯士金叢

心歸寂滅隨性過光陰一笑西山晚門前秋雨深

送武夷趙王賓道士

風流不比賀家狂蕭洒黃冠意自長自有武夷溪九曲
鑑湖何必問君王

蕭然被褐不求知歸傍仙船理釣絲却笑荆山空自售
未應有智不如癡

懶從原上訪桃花又不青門去種瓜傳得神仙蟬蛻法
君如欲覓問烟霞

琴碁書畫四首送趙道士

不知甲子定何年題滿柴桑日
醉眠意在不言君解否
壁間琴本是無絃

我愛商仙茹紫芝逍遙勝似橘中時
紛紛赤白方龍戰
世事笑來一局碁

蔡邕去後右軍死誰是風流入品題
只有蛟龍太師字
至今風骨在浯溪

欲覓龍眠舊時筆相傳此手世間無
黃金不買昭君本

只買嚴陵歸釣圖

讀杜詩

平生蹤跡只奔波偏是文章被折磨耳想杜鵑心事苦
眼看胡馬淚痕多千年夔峽有詩在一夜來江如酒何
黃土一丘隨處是故鄉歸骨任蹉跎

感懷二首

交游兵後似蓬飛流落天涯鵲繞枝唐室老臣唯我在
柳州先友託誰碑泥塗猶幸瞻佳士甘雨何如遇故知

一死一生情義重莫嫌收拾老牛尸

伏龍欲夾太陽飛獨拄擎天力弗支北海風沙漫漢節
浯溪烟雨暗唐碑書空已恨天時去惜往徒懷國士知
抱膝對人復何語紛紛坐冢卧為尸

先兩國初忌

九月七日

北風吹黃花落木寒蕭颼哀哀我慈母玉化炎海秋日
月水東流音容隔悠悠小祥哭下邳大祥哭幽州今此
復何夕荏苒三星周嗟哉不肖孤宗職曠不修昔母肉

未寒委身墮冠雉仰藥早云遂庶從地下遊太阿落人
手死生不自由南冠坐絕域大期落淹留白華下元髮
碧蘚生緇裘心口自相語形影旁無儔空庭鬼火間天
黑對牢愁魚軒在何處魂魄今安否兒女各北歸墳墓
委南陬寒食雨淒淒盂飯誰與投荊棘纏蔓草狐兔緣
荒丘長夜良寂寞與我同幽幽我心自勞止我命實不
猶昨夕夢堂上樂昔歡綢繆覺來尚恍惚血涕連衾裯
晨興一瓣香痛如螫在頭吾家白雲下萬里同關憂遙

憐弟與妹几筵羅庶羞既傷母在殯又念兄在囚兄囚
不足念母亦為母謀三聖去已遠穹垠莽洪流緬懷百
世慮白骨皆填溝冥冥先大夫鬱鬱蒼松楸防山迄合
塋瞑目復何求

重陽

萬里飄零兩鬢蓬故鄉秋色老梧桐鴈棲新月江湖滿
燕別斜陽巷陌空落葉何心定流水黃花無主更西風
乾坤遺恨知多少前日龍山如夢中

又三絕

世事蒙蒙醉不知
南山秋意滿東籬
黃花何故無顏色
應為元嘉以後詩

人間萬事轉頭空
皂帽飄蕭一病翁
不學孟嘉狂落魄
故將白髮向西風

老來憂患易淒涼
說到悲愁更斷腸
世事不堪逢九九
休言今日是重陽

夜

秋光連夜色萬里客淒淒落木空山杳孤雲故國迷衾
寒霜正下燈晚月平西夢過重成夢千門雞亂啼

雨雪

秋色金臺路殷勤半馬蹄因風隨作雪有雨便成泥過
眼驚新夢傷心憶舊題江雲愁萬疊遺恨鷓鴣啼

偶成

燈影沉沉夜氣清朔風吹夢度江城覺來知打明鐘未
忽聽隣家叫佛聲

烏兔東西不住天平生奔走亦茫然向來鞅掌真堪笑
爛漫如今獨自眠

得兒女消息

故國斜陽草自春爭元作相總成塵孔明已負金刀志
元亮猶憐典午身骭骹到頭方是漢娉婷更欲向何人
癡兒莫問今生計還種來生未了因

為或人賦

悠悠成敗百年中笑看柯山局未終金馬勝遊成舊雨

銅駝遺恨付西風
黑頭爾自誇江總
冷齒人能說褚公
龍首黃扉真一夢
夢回何面見江東

世事

世事孤鴻外
人生落日西
碁淫詩興薄
書倦夢魂迷
汨汨還坐悠悠笑
即啼一真吾自得
開眼總筌蹄

斷鴈

斷鴈西江遠
無家寄萬金
乾坤風月老
沙漠歲年深
白日去如夢
青天知此心
素琴絃已絕
不絕是南音

小年

燕朔逢窮臘江南拜小年
歲時生處樂身世死為緣
鴉噪千山雪鴻飛萬里天
出門意寥廓四顧但茫然

除夜

乾坤空落落歲月去堂堂
末路驚風雨窮邊飽雪霜
命隨年欲盡身與世俱忘
無復屠蘇夢挑燈夜未央

壬午

丙子上巳前二日予至真州
今俯仰六周星

矣撫時念事為之流涕聊寫我心質諸鬼神

爾

憶昔三月朔歲在火鼠鄉朝登迎鑾鎮夜宿清邊堂于
時全飈霧陽精黯無芒欖槍犯彤宮熊羆升御牀慘淡
銅駝泣威垂朱鳥翔我欲疏河嶽借助金與湯吾道率
曠野繞樹空傍徨慷慨撫鰲背艱闕出羊腸扶日上天門
隨雲拜東皇祖逖誓興晉鄭畋義扶唐人謀豈云及天
命不干常泗水沉洛鼎薊丘植汶篁瑤宮可敦后玉陛

單于王革命曠千古被服繇八荒海流忽西注天旋俄
右方嗟予俘為馘萬里勞梯航秋風上甌脫夜雪卧析
楊南冠鄭大夫北窖蘇中郎龍蛇共窟穴蟻蝨連衣裳
周旋洩勃間宛轉沮如塲漠漠蒼天黑悠悠白日黃風
埃滿沙漠歲月稔星霜地下雙氣烈獄中孤憤長唯存
葵藿心不改鐵石腸斷舌奮常山挾齒厲睢陽此志已
清壑餘命終巖墻夷吾不可作仲連久云亡王衍勸石
勒馮道朝德光末俗正靡靡橫流已湯湯餘子不足言

丈夫何可當出門仰天笑雲山浩蒼蒼

生日

憶昔閒居日端二逢始生升堂拜親壽
摠衣接賓榮載酒出郊去江花相送迎
詩歌和盈軸憂金石聲于時果何時朝
野方休明人生足自樂帝力無能名譬
如江海魚與水俱忘情詎知君父恩天
地同生成旄頭忽墮地氛霧迷三精黃
屋朔風捲園林殺氣平四海靡所騁
三年老于行賓僚半蕩覆妻子同飄零
無幾哭慈母有

頃遭潰兵束兵獻穹帳囚首送空圖痛甚衣冠烈甘於
鼎鑊烹死生久已定寵辱安足驚不圖坐羅網四見槐
雲青朱顏日復少玄髮益以星往事真蕉鹿浮名一草
螢牢愁寫元語初度感騷經朝登蓬萊門暮涉芙蓉城
忽復臨故國搖搖我心旌想見家下人念我涕為傾交
朋說疇昔惆悵雞豚盟空花從何來為吾舞娉婷莫道
無人歌時鳥不可聽達人貴知命俗士空勞形吾生復
安適拄頰觀蒼冥

端午

五月五日午薰風自南至試為問大鈞舉杯三酹地田
文當日生屈原當日死生為降城君死作汨羅鬼高堂
狐兔遊雍門發悲涕人命草頭露榮華風過耳唯有烈
士心不隨水俱逝至今荆楚人江上年年祭不知生者榮
但知死者貴勿謂死可憎勿謂生可喜萬物皆有盡不
滅唯天理百年如一日一日或千歲秋風汾水辭春暮
蘭亭記莫作留連悲高歌舞槐翠

自歎三首

猛思身世事四十七年無鶴髮俄然在鸞飛久已殂二
兒化成土六女掠為奴只有南冠在何妨是丈夫
北轍更寒暑南冠幾晦冥家山時入夢妻子亦闕情惆
悵心如失崎嶇命復輕遭時命如此薄分笑三生
疾病連三次形容落九分幾成白宰相誰識故將軍暗
坐羞紅日閒眠想白雲蒼蒼竟何意未肯喪斯文

病目

近來煩惱障左目忽茫茫聶政心雖碎劉伶醉未忘問
天天不應食日日何傷萬想由來假收拾太乙光
向來巖下電無故眩生花達摩面向壁盧仝一塌沙燈
前心欲碎鏡裏鬢空華何日看明月沈沈斗柄斜

有感

心在六虛外不知身網羅病中長日過夢裏好時多夜
夜頻能坐時時亦自歌平生此光景回首笑呵呵

拾遺

早起

曉日半窓紅
隣雞振翼雄
餘子貪慵睡
佳人理髮蓬
未忘塵俗慮
那免是非攻
前山渾不見
籠翠霧烟中

贈許柏溪惟一

長風吹飛藿
青蛭吟野草
流光速代謝
興懷令人老
遊子中夜起
悠悠酣且歌
明月委清照
江湖秋涉多
豈無臨淄魚
亦有邯鄲酒
懷古招王孫
登高重回首

吟嘯集

生朝

五月二日

客中端二日風雨送牢愁昨歲猶潘母今年更楚囚
田園荒吉水妻子老幽州莫作長生祝吾心在首丘

西瓜吟

拔出金佩刀斫破蒼玉瓶千點紅櫻桃一團黃水晶
下咽頓除煙火氣入齒便作冰雪聲長安清富說邵平
爭如漢朝作公卿

中原

中原方萬里明日是重陽桑棗人家近蓬蒿客路長引
弓虛射鴈失馬為尋獐見說今年旱青青麥又秧

石三峯為示十字云昔日乘龍貴今朝汗馬勞
為足六句

雲低昏海日風急沸江濤昔日乘龍貴今朝汗馬勞
綺汙塵土珠玉委蓬蒿若作淒然賦吾將僕命騷

蚤秋

寒魄澹玄河商飈慄明發羈人坐環堵壯士衣穿褐晉

陵誰復新秦陵尚云秣夫君百世心患不在飢渴

懷友人二首

久要何落落末路重依依風雨連兵幕泥途滿客衣人
間龍虎變天外燕鴻違死矣煩公傳北方人是非

涯海真何地驅來坐戰場家人半分合國事決存亡一
死不足道百憂何可當故人髯似戟起舞為君傷

寄惠州弟

五十年兄弟一朝生別離鴈行長已矣馬足遠何之莫

骨知無地論心更有誰親喪君自盡猶子是吾兒

感傷

地維傾渤海天柱折崑崙清夜為揮淚白雲空斷魂死
生蘇子節貴賤翟公門高廟神靈在乾坤付不言

自歎

海闊南風慢天昏北斗斜孤臣傷失國遊子歎無家官
飯身如寄征衣鬢欲華越王臺上望家國在天涯

虎頭山

蚤不逃秦帝終然陷楚囚故園春草夢舊國夕陽愁妾
婦生何益男兒死未休虎頭山下路揮淚憶虔州

高沙道中

道逢死人骨委積萬有千魂魄侵蠅蚋膏脂飽烏鳶使
我先朝露其事亦復然丈夫竟如此吁嗟彼蒼天古人
擇所趨肯蹈不測淵奈何以遺體糞土同棄捐初學蘇
子卿終慕魯仲連求仁而得仁寧怨溝壑填自古皆有
死死不愧前賢秦客載張祿吳人納伍員季布疑在魯

樊期托於燕國士急人病倜儻何拘孥伊人莫知我此
恨付重泉

戰場

三年海嶠擁貔貅一日蹉跎白盡頭垓下雌雄羞故老
長安咫尺泣孤囚魚龍沸海地為泣烟雨滿山天也愁
萬死小臣無足憾蕩陰誰共侍中遊

哭崖山

寶箴如山席六宗樓船千疊水晶宮吳兒進退尋常事

漢氏存亡頃刻中諸老丹心付流水孤臣血淚洒南風
早來朝市今何處始悟人間萬法空

元帥謂余曰國亡矣殺身以為忠誰復書之余
謂商雖亡夷齊不食周粟人臣自盡其心豈論
書與不書元帥為之改容

高人名若浼烈士死如歸智滅猶吞炭商亡正采薇豈
因微後福方肯蹈危機萬古春秋義悠悠雙淚揮

上塚吟

湘人有登科者初授武岡尉單車赴官守名家正
擇婿尉本有室隱其實而取焉官滿隨婦翁入京
自是捨桑梓去墳墓終身不歸後官至侍從其糟
糠妻居母家不復嫁歲時為夫家上塚婦禮不廢
友人作古詩一首曰上塚吟某讀之為之感慨因
更廣其意賦五言一篇

余昔從君時堂上拜姑嫜相携上祖塚歲時持酒漿姑
嫜相繼沒馬鬣不在鄉共君甌盂飯清涕流襦裳君貧

初赴官有家不得將妾無應書兒松檟自成行君別不
復歸歲月何茫茫長安擁朱綬執鴈事侯王豈無一紙
書道路阻且長年年酌寒食妾心良自傷君家舊巾櫛
至今襲且蔽諒君霜露心白首遙相望

墓無主墓碑

風雨中見道傍一碑題云墓無主墓之記乃大定戊
申所立雨衣淋漓字畫漫滅惜不得下馬讀之

路逢一石碑亭亭傲風雨停驂髣髴看云是無主墓末

書戊申歲屈指九十秋是時龍渡江甲子恍一周借問
奠者誰承平百世祖亦有周餘民戰骨委黃土太祖下
江南誓不戮一人神孫再立國天以報至仁大河流血
丹屠毒誰之罪潼關忽不守皇皇依汴蔡螳螂知捕蟬
不知黃雀來今古有興廢重為生人哀

邳州哭母小祥

我有母聖善鸞飛星一周去年哭海上今年哭邳州遙
想仲季間木主布筵几我躬已不閱祀事付支子使我

早淪落如此終天何及今畢親喪於分亦已多母嘗教我忠我不違母志九泉會相見鬼神共歡喜

哭母大祥

九月七日先母夫人大祥之辰某為子不孝南望
嗚咽為哀章一首

前年惠州哭母歛去年邳州哭母朞今年飄泊在何處
燕山獄裏菊花時哀哀王化如昨日兩度星周俄箭疾
人間送死一大事生兒富貴不得力祇今誰人守墳墓

零落瘴鄉一堆土大兒狼狽勿復道下有二兒併二女
一兒一女亦在燕佛廬設供捐金錢一兒一女家下祭
病脫麻衣日晏眠夜來我夢歸故國忽然海上見顏色
一聲雞叫淚滿牀化為清血衣裳濕當年嫠婦意謂何
親曾撫我夜枕戈古來全忠不全孝世事至此甘滂沱
夫人開國分齊魏生榮死哀送天地悠悠國破與家亡
平生無憾惟此事二郎已作門戶謀江南葬母麥滿舟
不知何日歸兄骨孤死猶應正首丘

哭妻文

烈女不嫁二夫忠臣不事二主天上地下惟我與汝嗚呼哀哉

先太師忌日

太師忌汗漫二紀似跳丸弟妹俱成立家鄉忍破殘衣
冠晨月暗墳墓夜風寒萬里逢先忌無言把淚彈

告先太師墓文

維己卯五月朔越二十有六日孝子某自嶺被執至南

安軍謹具香幣遣人馳告于先太師革齋先生墓下嗚呼人誰不為臣而我欲盡忠不得為忠人誰不為子而我欲盡孝不得為孝天乎使我至此極邪始我起兵赴難勤王仲弟將家遁于南荒宗廟不守遷我異疆大臣之誚國亡家亡靈武師興解后歸國再相出督身荷憂責江南之役義聲四克為親拜墓以剪荆棘大勲垂集一跌崎嶇妻妾子女六人為俘收拾散亡息于海隅庶幾奮鴈以為後圖惡運推遷天所廢弃有母之喪尋失

嫡子哭泣未乾兵臨其壘倉皇之間二女夭逝剪為囚虜形影獨存仰藥不濟竟北其轅係頸繫足過我里門望墓相從恨不九原爰指松楸有言若誓繼令支子實典祀事有姪曰陞我身是嗣興言及此血淚如雨嗚呼自古危亂之世忠臣義士孝子慈孫其事之不能兩全也久矣我生不辰罹此百凶求仁得仁抑又何怨幽明死生一理也父子祖孫一氣也冥漠有知尚哀鑒之

余始至南安軍即絕粒為告墓文遣人馳歸白之

祖禰瞑目長往含笑入地矣乃水盛風駛五日過廬陵又二日至豐城知所遣人竟不得行余至是不食垂八日若無事然私念死廬陵不失為首丘今心事不達委命荒江誰知之者盍少從容以就義乎復飲食如初因記左傳申包胥哭秦庭七日勺飲不入口不聞有它廼知餓踣西山非一朝夕之積也余嘗服腦子二兩不死絕食八日又不死未知死何日死何所哀哉

己卯十月一日至燕越五日罹狴犴有感而賦

七首

一

直絃不似曲如鉤自古聖賢多被囚
命有死時名不死身無憂處道還憂
可憐杜宇空流血惟願嚴顏便斫頭
結束長編猶在此竈間婢子見人羞

二

落落南冠自結纓
拚揚卧起影縱橫
坐移白日知何世
夢斷青燈問幾更
國破家亡雙淚暗
天荒地老一身輕

黃梁得失俱成幻五十年前元未生

范曄在獄中為士題扇云去白日之

皎皎即長夜之悠悠

三

心期耿耿浮雲上身事悠悠落日西千古興亡何限錯
百年生死本來齊沙邊莫待哀黃鵠雪裏何須問牧羝
此處曾埋雙寶劍虹光夜指楚天低

四

寥陽殿上步黃金一落顛崖地獄深蘇武窖中偏喜卧

劉琨囚裏不妨吟生前已見夜叉面死去只因菩薩心
萬里風沙知己盡誰人會得廣陵音

五

亦知戛戛楚囚難無奈天生一寸丹鐵馬行鑿南地熱
赭衣坐擁北庭寒朝食淡薄神還爽夜睡崎嶇夢自安
亡國大夫誰為傳祇饒野史與人看

六

風雪重門老楚囚夢回長夜意悠悠熊魚自古無雙得

鵲雀如何可共謀萬里山河真墮甌一家妻子枉填溝
兒時愛讀忠臣傳不謂身當百六秋

七

聽着鷓鴣啼淚滿襟國亡家破見忠臣關河歷落三生夢
風雪飄零萬死身丞相豈能堪獄吏故侯安得作園人
神農虞夏吾誰適回首西山繼絕塵

八

風前泣燈影日下泣霜花鐘信忽然動屋陰俄又斜悶

中聊度歲夢裏尚還家地獄何須問人間見夜叉

九

風霜陰忽忽天地澹悠悠我自操吳語誰來問楚囚寂
中惟滅想達處盡忘憂手有韋編在朝聞夕死休

十

環堵塵如屋累然一故吾解衣烘稚蟲勻鐫救殘鬚坐
處心如忘吟餘眼已枯不應留滯久何日裹蘧篨

吳殺諸葛

恪以蘧篨裹而弃之

十一

浩劫風塵暗衣冠痛百罹靜傳方外學晴寫獄中詩烈士惟名殉真人與物違世間忙會錯認取去來時

十二

儼然楚君子一日造王庭議論探堅白精神入汗青無書求出獄有舌到臨刑宋故忠臣墓真吾五字銘

十三

兩月縲囚裏一年憂患餘踈因隨事直忠故有時愚道

在身何拙心安體自舒近來都勘破人世只蘧廬

十四

衮衣坐縲紲世事亦堪哀枕外親炊黍爐邊細畫灰無人淚垂血何地骨生苔風雪江南路夢中行探梅

十五

我自憐人醜人方笑我愚身生豫讓癩背發范增疽已愧功臣傳猶堪烈士書衣冠事至此命也欲何如

十六

久矣忘榮辱今茲一死生理明心自裕神定氣還清欲
了男兒事幾無妻子情出門天宇濶一笑暮雲橫

十七

拱壁衣冠十六傳更無一士死君前自慚重趙非九鼎
猶幸延韓更數年孟博囊頭真自愛果卿鉤舌要誰憐
人間信有綱常在萬古西山皎月懸

和夷齊西山歌

訶曰登彼西山兮採其薇矣以暴易暴兮不知其

非矣神農虞夏忽然沒兮我安適歸矣吁嗟徂兮
命之哀矣後二千餘年某人廼倚歌而和之曰
小雅盡廢兮出車采薇矣吁嗟中國兮宋祚非矣明王
不興兮吾誰與歸矣抱春秋以沒世兮甚矣吾哀矣

又從而歌之曰

彼美人兮西山之薇矣北方之人兮為吾是非矣異域
長絕兮不復歸矣鳳不至兮德之哀矣

十二月二十日作

家國哀千古星霜忽一周
黃沙漫故道白骨委荒丘
許遠死何晚李陵生自羞
南來冠不改吾且任吾囚

二十四日

俗云小
年夜

壯心負光岳病質落幽燕
春節前三日江鄉正小年
歲時有如水風俗不同天
家廟荒苔滑誰人燒紙錢

立春

己卯十二月
十六日

無限斜陽故國愁
朔風吹馬上幽州
天翻地覆三生劫
歲晚江空萬里囚
烈士喪元端不惜
達人知命復何憂

祇應四十三年死兩度無端見土牛

遇靈陽子談道贈以詩

昔我愛泉石長揖離公卿結屋青山下咫尺蓬瀛至
人不可見世塵忽相纓業風吹浩劫蝸角爭浮名偶逢
大呂翁如有宿世盟相從語寥廓俯仰萬念輕天地不
知老日月交其精人一陰陽性本來自長生指點虛無
間引我歸圓明一針透頂門道骨由天成我如一逆旅
人欲躡屩行聞師此妙訣蘧廬復何情

歲祝犁單闕月赤奮若日馬逢涪灘遇異人指
示以天光明正法於是死生脫然若遺矣作五
言八句

誰知真惠難忽悟大光明日出雲俱靜風消水自平功
名幾滅性忠孝大勞生天下惟豪傑神仙立地成

己卯歲除

歲除破衣裳夜半刺針線游子長夜思佳人不可見草
枯稚驢吼燈暗饑鼠現深室閉星斗輕裘臥風霰大化

忽流幹浩劫蕩回轉冠屨失其位侯王化畸賤弓戈叱
奇字刀鋸摧頰弁至性詎可遷微軀不足戀真人坐冲
漠死生一乘傳日月行萬古神光索九縣

右自己卯十月一日至歲除所賦當時望旦
夕死不自意蹉跎至今詩凡二十餘首明日
為商橫執除歲不知又當賦若干首而後絕
筆云已卯除日姓某題

元日

庚辰歲

鐵馬風塵暗金龍日月新衣冠懷故國鼓角泣離人自
分流年晚不妨吾道春方來有千載兒女枉悲辛

庚辰四十五歲

東風昨夜忽相過天地無情奈老何千載方來那有盡
百年未半已為多君傳南海長生藥我愛西山餓死訶
泡影生來隨自在悠悠不管世間魔

感興

萬里雲山斷客魂浮雲心事向誰言月侵鄉夢夜推枕

風送牢愁晝掩門
蘇子窖中間
日月石郎家裏舊乾坤
朝聞夕死吾何恨
坐把春秋仔細論

正月十三日

去年今日遁崖山
望見龍舟咫尺間
海上樓臺俄已變
河陽車駕不須還
可憐羝乳煙橫塞
空想鵑啼月掩關
人世流光忽如此
東風吹雪鬢毛斑

上元懷舊

禁門三五金吾夜
回首青春忽二毛
池上昔陪王母宴

斗中今直貴人牢風生江海龍遊遠月滿關山鶴唳高
夢到釣天燈火閭依然彩筆照宮袍

讀史

自古英雄士還為薄命人孔明登四十韓信過三旬壯
志摧龍虎高詞泣鬼神一朝事千古何用怨青春

感傷

家國傷冰泮妻孥歎陸沉半生遭萬劫一落下千尋各
任汝曹命那知吾輩心人誰無骨肉恨與海俱深

遣興

一落顛崖不自由，春風相對說牢愁。
稚驢黑月光中吼，饑鼠青燈影下遊。
豈料乾坤成墮甑，始知身世是虛舟。
遙憐海上今塵土，前代風流不肯休。

又

東風吹草日高眠，試把平生細問天。
燕子愁迷江右月，杜鵑聲破洛陽煙。
何從林下尋元亮，只向塵中作魯連。
莫笑道人空打坐，英雄收斂便神仙。

金瓶梅
卷二十一
四月八日

今朝浴佛舊風流身落山前第一州
贛上瑤桃俄五稔海中玉果已三周
人生聚散真成夢世事悲歡一轉頭
坐對薰風開口笑滿懷耿耿復何求

夜起

夢破東窓月半明此身雖在只堪驚
一春花裏離人淚萬里燈前故國情
龍去想應回海島鴈飛猶未出江城
客愁多似西山雨一任蕭條白髮生

端午感興

千金鑄鏡百神愁
功與當年禹服侔
荊棘故宮魑魅走
空餘揚子水東流

又

當年忠血墮讒波
千古荊人祭汨羅
風雨天涯芳草夢
江山如此故都何

又

流棹西來恨未銷
魚龍寂寞暗風潮
楚人猶自貪兒戲

江上年年奪錦標

見艾有感

過眼驚初夏回頭憶晚春已憐花結子又見艾為人故
國丹心老中原白髮新靈修解解化清夢楚江濱

自嘆

綠槐雲影弄黃昏月照牢愁半掩門一片心如千片碎
十分鬚有二分存沙邊黃鵠長回首江上杜鵑空斷魂
豎子溷人漫不省紅纓白馬意軒軒

自遣

詩餘眠白日飲後坐清風萬事乘除裏平生寵辱中心
無隨境變意自與天通莫笑邯鄲夢惺惺更是空

自述

赤舄登黃道朱旗上紫垣有心扶日月無力報乾坤往
事飛鴻渺新愁落照昏千年滄海上精衛是吾魂

不睡

終夕起推枕五更聞打鐘精神入朱鳥形影落盧龍弭

節蓬萊島揚旗太華峰奔馳竟何事回首謝喬松

七夕

大地風塵惡長天歲月奔憂來渾是感夢破與誰言
鵲空回首河牛暗斷魂吾今拙又拙無復問天孫

有感

石郎草草割山川一落人手三百年八州風雨暗連天
三皇五帝如飛煙人人野祭伊水邊春秋斷爛不復傳
白頭潦倒今魯連夜深危坐日晏眠

聞季萬至

去年我別旋出嶺今年汝來亦至燕弟兄一囚一乘馬
同父同母不同天可憐骨肉相聚散人間不滿五十年
三仁生死各有意悠悠白日橫蒼煙

有感

丁丑歲八月十七日家人陷今恰三周而予
在行既十閱月矣有感而賦

平生心事付悠悠風雨燕南老楚囚故舊相思空萬里

妻孥不見滿三秋絕憐諸葛隆中意贏得子長天下遊
一死皎然無復恨忠魂多少暗荒丘

感懷

己卯八月二十四日予以楚囚發金陵十月
一日至燕越五日罹狴犴今為庚辰中秋後
九日感懷四十字

去歲趨燕路今晨發楚津浪名千里客剩作一年人鏡
裏秋容別燈前暮影親魯連疑未死聊用托芳塵

重陽

庚辰

飄零萬里若為家一夜西風吹鬢華祇有新詩題甲子
更無故舊對黃花

又

江南秋色滿梧桐回首青山萬里空怕見鏡中新白髮
長將破帽裹西風

又

風捲車塵弄曉寒天涯流落寸心丹去年醉與茱萸別

不把今年作健看

已卯十月一日予入燕城歲月冉冉忽復周星
而予猶未得死也因賦八句

去冬陽月朔吾始至幽燕浩劫真千載浮生又一年天
南照天北山後接山前夢裏乾坤老孤臣雪咽羶

已卯十月五日子入燕獄今二十有六旬感興
一首

石晉舊燕道鍾儀新楚囚山河千古痛風雨一年周過

鴈催人老寒花送客愁捲簾雲滿坐抱膝意悠悠

去年十月九日余至燕城今周星不報為賦長

句

君不見常山太守罵羯奴天津橋上舌盡剗又不見睢
陽將軍怒切齒三十六人同日死去冬長至前一日朔
庭呼我弗為屈丈夫開口即見膽意謂生死在頃刻赭
衣冉冉生蒼苔書雲時節忽復來鬼影青燈照孤坐夢
啼死血丹心破只今便作渭水囚食粟已是西山羞悔

不當年跳東海空有魯連心獨在

冬至

書雲今日事夢破曉鳴鐘家禍三生劫年愁兩度冬江
山乏小草霜雪見孤松春色蒙泉裏煙蕪幾萬重

冬晴

北國天寒少南方地氣來年光如箭去世事正輪迴可
怪新祈雪相思久別梅夜闌燈坐暗獨自撥殘灰

自嘆

可憐大流落白髮魯連翁每夜瞻南斗連年坐北風三
生遭際處一死笑談中贏得千年在丹心射碧空

戊寅臘月二十日空坑敗被執于今二周年矣

感懷八句

橫磨十萬坐無謀回首蹉跎海上州太傅祇圖和藥了
將軍便謂斫頭休乾坤顛倒真千劫身世留連復一周
一死到今如送佛空窻淡月夜悠悠

所懷

萬里青山兩鬢華老臣無國又無家
乾坤局促籠中鳥風雪飄零糞上花
歲晚江空人已逝天寒日短路何賒
書生不作網常計聞是東門已種瓜

除夜

庚辰

門掩千山黑孤燈伴不眠
故鄉在何處今夕是窮年
住世真無係為囚已自然
勞勞空歲月得死似登仙

又

歲暮難為客天涯況是囚
乾坤還許大歲月忽如流
夢

過元無夢憂多更不憂屠蘇兒女態肯作百年謀

元日

辛巳

金虬銜日出鐵騎勒春回天上青門隔人間白髮催霜
寒欺舊草山晚放新梅環堵甘牢落東風枉却來

又

慙愧雲臺客飄零雪滿瓊不圖朱鳥影猶見白蛇年宮
殿荒煙隔門庭宿草連乾坤自春色回首一潸然

初六日即事

車馬燕山鬧誰家早管絃開門忽見雪擁被不知年篋
破書猶在爐殘火復燃偷挑昨日事回首哭堯天

人日

今年為蛇年此日是人日江右一龍鍾山中舊佔畢獨
坐守大元一笑發狂疾悠悠王正意哀涕感麟筆

自嘆


功業羞前輩形骸感故吾屢判嵇紹血幾誤慶公鬚落
落惟心在蒼蒼有意無江流總遺淚何止失吞吳

元夕

燈火喧三市衣冠宴九宸金吾不禁夜公子早行春夢
斷青山遠愁侵白髮新燕山今夕月清影伴孤臣

又

飄零竟如此元夕幾堪憐南國張燈火燕山沸管絃相
思雲萬里剩看月三年笑與東風道浮生信偶然



文山集卷二十